

Odluka o izmjenama i dopunama Izbornog Zakona BiH kojom se smanjuje period objave izbora sa 170 na 169 dana

Koristeći se ovlastima koje su mi date članom V Aneksa 10 (Sporazum o civilnoj implementaciji Mirovnog ugovora) Općeg okvirnog sporazuma za mir u Bosni i Hercegovini prema kojem je Visoki predstavnik konačni autoritet u zemlji u vezi tumačenja gore navedenog Sporazuma o civilnoj implementaciji Mirovnog ugovora; i posebno uzevši u obzir član II 1. (d) istog Sporazuma prema kojem Visoki predstavnik "pomaže, kada Visoki predstavnik to ocijeni neophodnim, u rješavanju svih problema koji se pojave u vezi s civilnom implementacijom";

Pozivajući se na stav XI.2 Zaključaka Konferencije za implementaciju mira održane u Bonu 9. i 10. decembra 1997. godine, u kojima je Vijeće za implementaciju mira pozdravilo namjeru Visokog predstavnika da iskoristi svoj konačni autoritet u zemlji u vezi tumačenja Sporazuma o civilnoj implementaciji Mirovnog ugovora, kako bi pomogao u iznalaženju rješenja za probleme u skladu sa gore navedenim "donošenjem obavezujućih odluka, kada to ocijeni neophodnim", o određenim pitanjima, uključujući i (prema podstavu (c) stava XI.2) mjere kojima se osigurava implementacija Mirovnog sporazuma na cijelom području Bosne i Hercegovine i njenih entiteta;

Konstatirajući da je Upravni odbor Vijeća za implementaciju mira na svojoj sjednici održanoj u Briselu 28. februara 2002. godine naglasio da su politički lideri i institucije BiH odgovorni da osiguraju da građani Bosne i Hercegovine budu u mogućnosti da ostvare svoja demokratska prava na predstojećim slobodnim, pravednim i demokratskim izborima u oktobru 2002. godine;

Prihvatajući odredbe koje je usvojila Parlamentarna skupština Bosne i Hercegovine u Izbornom zakonu objavljenom u Službenom glasniku BiH br. 23/01 od 19. septembra 2001. godine, te izmjene i dopune tih odredbi objavljene u Službenom glasniku BiH br. 7/02 od 10. aprila 2002. godine;

Uzimajući uobzir da je u članu 1.14 Izbornog zakona Bosne i Hercegovine, *između ostalog*, navedeno da će se izbori za sve nivoe vlasti u Bosni i Hercegovini održati prve subote u oktobru mjesecu, te da će Izborna komisija Bosne i Hercegovine, najmanje sto sedamdeset (170) dana prije održavanja izbora, obavijestiti sve nadležne organe vlasti na svim nivoima kada će se izbori održati;

Konstatirajući da se Upravni odbor Vijeća za implementaciju mira sastao 27. marta 2002. godine i zaključio, *između ostalog*, da amandmani na ustave entiteta moraju biti u potpunosti u skladu sa Sporazumom koji su postigle političke stranke 27. marta 2002. godine, te zahtijevao od parlamenata entiteta da usvoje amandmane do prve sedmice aprila 2002. godine kako bi se ostavilo dovoljno vremena da se Izborni zakon Bosne i Hercegovine uskladi s njima;

Konstatirajući sa žaljenjem da parlamenti entiteta nisu ispoštovali rok koji im je Vijeće za implementaciju mira dalo da usvoje amandmane na ustave entiteta u skladu sa Odlukom o konstitutivnosti naroda i Sporazumom od 27. marta 2002. godine, do prve sedmice aprila 2002. godine;

U cilju obezbjeđivanja mogućnosti Izornoj komisiji Bosne i Hercegovine da objavi izbore za 5. oktobar u skladu sa izmijenjenim i dopunjenim ustavima entiteta;

Zbog razloga navedenih ovdje, donosim sljedeću:

ODLUKU O IZMJENAMA I DOPUNAMA IZBORNOG ZAKONA BOSNE I HERCEGOVINE

Izborni zakon Bosne i Hercegovine, objavljen u Službenom glasniku Bosne i Hercegovine broj 23/01 od 19. septembra 2001. godine, te izmijenjen i dopunjen kako je objavljeno u Službenom glasniku Bosne i Hercegovine broj 7/02 od 10. aprila 2002. godine, mijenja se i glasi:

Član 1.

U članu 1.14, nakon stava 2, dodaje se novi stav 3 i glasi:

“Bez obzira na rok od najmanje sto sedamdeset (170) dana, koji je utvrđen u prethodnom stavu ovog člana, za obavijest koju Izborna komisija Bosne i Hercegovine treba dati svim nadležnim organima vlasti na svim nivoima o tome kada će se izbori održati, ovaj rok za prve izbore koji se trebaju održati u skladu sa odredbama ovog Izbornog zakona će biti najmanje sto šezdeset devet (169) dana prije datuma održavanja izbora.”

Postojeći stav 3 postaje stav 4.

Ova Odluka stupa na snagu odmah i biće odmah objavljena u Službenom glasniku Bosne i Hercegovine, Službenim novinama Federacije Bosne i Hercegovine, Službenom glasniku Republike Srpske i Službenom glasniku Distrikta Brčko.

Sarajevo, 18. april 2002. godine

Wolfgang Petritsch

Visoki predstavnik